

省田積

善心

間

雜

言

錄續積善錄

書



省
心
雜
言

李邦獻
撰

中
華
書
局

省心雜言原敘

夫入德之門莫大乎知。知斯能至。知而不至者有矣。未有不知而能至者也。是以教雖多術。一言以蔽之曰知。故有志于天下國家者。亦以致知爲本。寓直敷文。開領天台祠事。河內李公。知而至者也。昔獲見之于夔峽。今三十年。公日以通顯。分符將指。歷官中外。至八易使節。凡可以利民爲國。有知必爲。嘗因將濟。帝畿。數被召對。竭忠以告上。省費以紓民。力行所知。不少遜避。故于仕已而無喜愠。俯仰而無愧怍。然以是受知于君。亦以是取異于世。其表著于時者如是。有松楸在巴蜀。將歸。過九江。以省心雜言一編相示。皆平昔銘諸座右者。曰。每患知之弗至。有得于心。輒榜之壁。以自警。兒輩錄而藏之。積之久。至如此。雖然。其敢示他人哉。姑欲付子孫。以見吾志云耳。于時者之所自也。其多至數十百章。旁見雜出。從容中道。無所不用其極。非明于憂患與故知至而至之者不能。如已試之醫方。以儲之寶聚。盡廣其施。俾人得而知。誠意正心。推之以及于天下國家。是乃竭盡所知。報上化俗之一端。而亦公所當任也。紹興庚辰八月初吉。廬阜老圃祁寬謹序。

省心雜言

宋 李邦獻撰

簡言擇交可以無悔吝。可以免憂辱。
無瑕之玉。可以爲國器。孝悌之子。可以爲家瑞。
爲政之要。曰公與勤。成家之道。曰儉與清。
聞善言則拜。告有過則喜。非聖賢不能。
寶貨用之有盡。忠孝享之無窮。
和以處衆。寬以接下。恕以待人。君子人也。
坐密室如通衢。馭寸心如六馬。可以免過。
諛言巧。佞言甘。忠言直。信言寡。
多言則背道。多欲則傷生。
話人之短。不曰直。濟人之惡。不曰義。
好勝者必爭。貪榮者必辱。
知足則樂。務貪則憂。

好名則立異。立異則身危。故聖人以名爲戒。
內睦者。家道昌。外睦者。人事濟。

不匿人短。不周人急。非仁義人也。

心不清。則無以見道。志不確。則無以立功。
結怨于人。謂之種禍。捨善不爲。謂之自賊。

諾輕者。信必寡。面譽者。背必非。

孝于親。則子孝。欽于人。則衆欽。

聲色者。敗德之具。思慮者。殘生之本。

爲善不如捨惡。救過不如省非。

欲不墮。則博施。欲長樂。則守分。

廣積不如教子。避禍不如省非。

勉強爲善。勝于因循爲惡。

責人者。不全交。自恕者。不改過。

自滿者敗。自矜者愚。自賊者忍。

多言獲利。不如默而無害。

寡言省謗。寡慾保身。

行坦途者。肆而忽。故疾走則歷。行險途者。畏而謹。故徐步則不跌。然後知安樂有致死之道。憂患爲養生之本。可不省諸。

太廟之犧。被文繡。而悔不及鷓鴣深林一枝之樂也。

廣積聚者。遺子孫以禍害。多聲色者。殘性命以斤斧。

以衆資己者。心逸而事濟。以己禦衆者。心勞而怨聚。

自信者。人亦信之。胡越猶兄弟。自疑者。人亦疑之。身外皆敵國。

漁獵不同風。舟車不並容。飲食嗜好。禮義貪殘。四夷與中國殊絕。若冰炭。至于推誠則不欺。守信則不疑。

六合之內可行。動天地。感鬼神。非誠信不可。

爲善如負重登山。志雖確而力猶恐不及。爲惡如乘駿走坂。雖不加鞭策而足亦不能止。

務名者。殺其身。多財者。禍其後。

善惡報緩者。非天網疎。是欲成君子而滅小人也。

禍福者。天地所以愛人也。如雷。雨雪。霜。皆欲生成萬物。故君子恐懼而畏。小人僥倖而忽。畏其禍則福生。

忽其福則禍至。傳所謂禍福無門。惟人自召也。

薄于所親而責人重者。不可與言交。好名欲速者。不可與共謀。貪而喜詐者。不可與利害。忍而好勝者。不

可與同逸樂。

以忠沽名者訐。以信沽名者詐。以廉沽名者貪。以潔沽名者汙。忠、信、廉、潔，立身之本。非釣名之具也。有一于此，鄉原之徒，又何足取哉。

爲己重者不仁。奸廣積者不義。足恭者無禮。貪名者無智。

功名、官爵、貨財、聲色，皆謂之欲。俱可以殺身。或問之曰：欲可去乎？曰：不可。飢者欲食，寒者欲衣，無後者欲子孫，是甘于自殺也。然知足而不貪，知節而不淫，無沽名之心而不求功，亦庶乎欲可窒也。

立身之道，內剛外柔，肥家之道，上遜下順，不和不可以接物，不容不可以馭下。

天下有甚于飢食渴飲之道，而世或以名稱己，或以爲能事，哀哉！臣之忠、子之孝、弟之悌，是也。孔子以文學爲孝悌之餘事，孟子謂良知良能不出于學，是非聖人強人以甚難耳。豈愛欲汨其心，而妻子爵祿爲賊忠孝之具，間有得臣子之道者，宜乎表出于世。苟以孔孟之道，反求諸己，則知捨孝弟不足以爲人，移孝弟爲忠順，則立身行己之道當然。世或所稱，己何能之有。

前輩論醫云：閉門看古方三年，知天下無病不可治，及其出而用藥療疾，知古今無方可用，此無他，聞見力極則止。至于應變，則無有窮盡。噫！豈但論醫也？士之學問，其失正在是。苟以是心反之，孳孳旦夜，自不知爲有餘，縱未能盡天下之疾，亦庶幾乎十失二三也。

知不足者好學，耻問者自滿，一爲君子，一爲小人，自取如何耳。

不自重者取辱。不自畏者招禍。不自滿者受益。不自是者博聞。吉凶悔吝自天。然無有不由己者。壽夭在天。安危在人。知天理者。天或可壽。忽人事者。雖安必危。

千斤之石。置之立坂之上。一力可以落九仞。萬斛之舟。溯于急流之中。片帆可以去千里。勢使然也。若馳羣馬于平陸。集多士于大庭。非駿足奇才。不可得先。

人之有過失。猶身之有疾病。攻之以藥石。誨之以廉恥。雖過失不害爲賢者。雖疾病不失爲全人。

爲善者不云利。逐利者不見善。舜跖之徒。自此分。捨生取義。固不可得。見利思義。聖人亦取之。殆哉。不可言。況可爲乎。孟子答梁惠王之言至矣。

口腹不節。致疾之因。念慮不正。殺身之本。

驕富貴者。戚戚。安貧賤者。休休。所以景公千駟。不及顏子之一瓢也。

外事無大小。中慾無淺深。有斷則生。無斷則死。大丈夫以斷爲先。

人皆有奸生惡死之心。人皆有捨生取死之道。何也。見善不明耳。

教子弟無他術。使耳所聞者善言。目所見者善行。善根于心。則動容周旋無非善。譬如胡越交居。再世則語音變。幼則視父兄。長則視朋友。雖然善惡有種。視先世如何耳。

有過能悔者。不失爲君子。知過遂非者。其小人耳。

官爵富貴。在人謂之倘來。道德行義。在我謂之自得。倘來者。足以驕妻妾。自得者。可以輕公卿。君子所以

修天爵而人爵從之。

事親有隱而無犯。事君有犯而無隱。事師無犯無隱。聖人不易之論也。古之所謂犯者。以己所見而陳之于君。不以犯上爲犯也。後世所謂犯者。處卑位而言非其職。徒以沽名之心。務行其說。直前詆訐。無益于世。愚以謂若能以事師之道事君。無隱則不敢逢君之惡。無犯則不忍暴君之失。諫可行。言可聽。膏澤可下于民。不亦美歟。

欲去病則正本。本固則病可攻。藥石可以効。欲齊家則正身。身端則家可理。號令可以行。固其本。端其身。非一朝一夕之事也。

事親孝者。事君必忠。何以知之。良知固存。雖妻子不能移其愛。推此以盡爲臣之道。則爵祿安能易其守。子惟知有親焉。得不孝。臣惟知有君。安得不忠。所以良知者。其可忘乎。

父慈。子孝。兄弟恭。相須之理也。然子不可待父慈而後孝。弟不可待兄友而後恭。譬猶責人以信。然後報之以誠。盡己之當爲君子。所以立身之道。非求備于人也。

以禮義爲交際之道。以廉恥爲律己之法。遊息于是。朋友見欽而不敢欺。妻子取法而不敢侮。盡思患預防之理。可以譬之四維。其可廢而不張乎。

耽獵聲色之娛。易而難反。車服口體之奉。相尚而無厭。皆非逸豫安樂之道。靜吉動凶。德休僞拙。聖人戒告甚切。至反身而求。樂莫大焉。知此爲君子。昧此爲小人。

恐懼者。修身之本。事前而恐懼。則畏。畏可以免禍。事後而恐懼。則悔。悔可以改過。知者以畏消悔。愚者無所畏而不知悔。故智者保身。愚者殺身。大哉所謂恐懼也。

心可逸。形不可不勞。道可樂。身不可不憂。形不勞則怠惰易弊。身不憂則荒淫不止。故逸生于勞而嘗休。樂生于憂而無厭。是逸樂也。憂勞其可忘乎。

毀譽難至。觀其事則毀譽明。善惡混淆。公其心則善惡判。此在上之職也。若智効一官。能効一職。行其所當爲。而不問毀譽。立乎其中道。則善惡如黑白也。

古之人修身以避名。今之人飾己以要譽。所以古人臨大節而不奪。今人見小利而易守。君子人則不然。無古無今。無治無亂。出則忠。入則孝。用則智。捨則愚。事親孝。則專其愛。而妻子不能移。事君忠。則盡其職。而爵祿不足動。竭力于親者。不必須士類。致身于黼藻太平。戡定禍亂。可以謂之忠乎。苟有隱于君。不若恐下不欺之忠也。列侯而封。擊鮮而食。可以謂之孝乎。苟有遠于親。不若貧賤養志之孝也。

有聖賢之君。無忠直之臣。則聰明不能達遠。雖聖賢或可欺。大哉所謂爲君難。財用足以富國家。一夫可爲。風俗所以繫治亂。非有位君子不能變。必欲弭禍亂。致太平。非風俗淳儉不可。

愛君切者。不知有富貴。爲己重者。不能立功名。

木有所養。則根本固。而枝葉茂。棟梁之材。生木有所養。則泉源壯。而流派長。灌溉之利。博人有所養。則志

氣大而識見明。忠義之士出。可不養哉。故孟子所謂苟得其養。無物不長也。財不難聚也。取于當。則富足。國不難治也。邪正辨。則不平風不難化也。自上及下而風行。俗不難革也。自邇及遠而俗變。

以愛妻子之心事親。則曲盡其孝。以保富貴之策奉君。則無往不忠。以責人之心責己。則寡過。以恕己之心恕人。則全交。

士大夫若止以一官之廩祿計。則不知其爲素餐。請以驅役之卒。奉承之吏。供帳居處。詳陳悉算。則凜然如履冰。惕然如臨淵。有婉于方寸者多矣。若于奉公治民之道不加思。則竊人之財不足爲盜矣。堂下遠于千里。況于九重之深。雖堯舜不能知。比屋有人能以所聞所見。上體人君愛民求治之意。委曲詳陳之。則都俞之間。可以弭禍亂。不兵而致太平也。

以忠孝遺子孫者昌。以智術遺子孫者亡。以謙接物者強。以善自衛者良。

爾謀不臧。悔之何及。爾見不長。教之何益。利心專則背道。私意確則滅公。

能自愛者。未必能成人。自欺者。必問人。能自儉者。未必能周人。自忍者。必害人。此無他。爲善難。爲惡易也。子之事親。不能承顏養志。則必不能忠于君。弟之事兄。不能致恭盡禮。則必不能遜于長上。

家不和。無以見孝子。國不亂。無以見忠臣。如是則孝子忠臣不容見于世也。僕竊疑之。有人能克諧六親。

欽順父母。家不使不和。莫大之孝也。有人能引君當道。將順正教。國不使之亂。莫大之忠也。

嘗謂風俗不淳儉。則財用無豐足。蓋富貴者。奢侈相尚。奉養之外。棄廢寶貨。窮極土木。惟務相勝。貧賤者。專于工巧伎藝。古所未見。一日之直。可以獲農夫終歲之利。故棄本逐末。耕桑者少。而衣食者多。求其盈餘儲積。不亦難哉。甲冑之士。可以責以禦侮。州縣之吏。不過委以簿書。事君而變薄俗。非大有力者不可。婦人悍者。必淫醜者。必妬。如士大夫。繆者忌。險者疑。必然之理也。

費萬金爲一瞬之樂。孰若散而活餒者幾千百人。處眇軀以廣廈。何如庇寒士以一席之地乎。知足者。貧賤亦樂。不知足者。富貴亦憂。

夙興夜寐。無非忠孝者。人不知。天必知之。飽食煖衣。恬然自衛者。身雖安。其如子孫何。

人之所以異于禽獸草木者。以其有爲耳。皮毛齒角。禽獸以用而名。香味補瀉。草木以功而著。人之生也。無德以表俗。無功以及物。曾禽獸草木之不若也。哀哉。

器滿則溢。人滿則喪。

用心專者。雷霆不聞其響。寒暑不知其勞。爲己重者。不知富貴可以殺身。功名可以及後。行四通八達之衢者。不迷。思大公至正之道者。不惑。

蠻夷不可以力勝。而可以信服。鬼神不可以情通。而可以誠達。況涉世與人爲徒。誠信其可捨諸。歲月已往者不可復。未來者不可期。見在者不可失。

爲善則善應。爲惡則惡報。成名滅身。惟自取之。

以德遺後者昌。以禍遺後者亡。謙柔卑退者。德之餘。強忍奸詐者。禍之始。

舜之所以爲孝者。有頑父。嚚母。傲弟。人不幸而有此。當克諧如舜。不爲甚難。孟子曰。舜何人也。予何人也。有爲者亦若是。

韓非作說難。而卒斃于說。豈非所謂多言數窮之戒耶。

屈己者能處衆。好勝者必遇敵。

欲常服者不爭。欲常樂者自足。

有限之器。投之滿盈則溢。太虛之空。物物自容。靜躁寬猛。視量之如何耳。

張飽帆于大江。驟駿馬于平陸。天下之至快。反思則憂。處不爭之地。乘獨後之馬。人或我噴。樂莫大焉。勝于己者可師。拙于己者可役。愛于己者。知善而不知惡。憎于己者。見惡而不見善。

強辨者飾非。不知過之可改。謙恭者無諍。知善之可遷。

善惡在自爲。父子不相授。堯爲父而有丹朱。舜爲子而有瞽瞍。堯與賢易。舜克諧以孝難。

與善人交。有終身了無所得者。與不善人交。動靜語默之間。亦從而似之。何耶。人性如水。爲不善如就下。交友之間。安可不擇。

人之制性。當如隄防之制水。朝培暮植。猶恐蟻漏之易壞。若汎濫不固。一傾而不可覆也。

近世士大夫多爲子弟所累。是溺于愛而甘受其謗。殊不知父當不義。聖人猶許子諍。子弟不肖。而不能令。是納于邪而不知義方之訓也。父兄之罪大矣。

綺語背道。雜學亂性。

邪正者。治亂之本。賞罰者。治亂之具。舉正措邪。賞善罰惡。未有不治者。邪正相雜。賞罰不當。求治亦難矣哉。

不隨難。不見忠臣之心。不趨利。不知義士之節。

予奪者。上之柄。臣不得專。賞罰者。上之權。其可私以循人乎。

天下有正道。邪不可干。以邪干正者。國不治。天下有公議。私不可奪。以私奪公者。人弗服。

富貴在天。取捨在人。在天者聽。在人者斷。良善者聽之道。謙損者斷之本。

富貴以道得。伊尹是也。貧賤以道守。顏淵是也。俱爲聖爲賢。負鼎干湯。與簞瓢陋巷。勞逸憂樂。不可同日而語也。

聖賢師心不師迹。雖百世而道同。後世師跡不師心。雖時同而術異。

目主明。五色可以盲其明。耳主聰。五音可以聾其聰。非耳目之罪。心不正。則視聽狂。聰不聰。明不明也。大則治亂邪正。小則晝夜死生。皆反手耳。反邪則正。反亂則治。反夜爲晝。反死則生。豈可猶豫苟且而爲哉。

耳雖聞、目不親見者、不可從而言之。流言可以惑衆、若聞其言而貽後世、恐是非邪正失實。憂國者不顧身、愛民者不罔上。

以是爲非、以非爲是者、強辯足以惑衆、以無爲有、以有爲無者、便僻足以媚人、心可欺、天可欺乎。君子獨立而持正、故助之者鮮、小人挾黨以濟私、故從之者多。

君子周身以道、小人周身以術。

憂天下國家者、其慮深、其志大、其利博、其言似迂、其合亦寡、其遇亦難、吾孔、孟是也。趨捷徑者、不問大路、喜佞言者、不親正人。

得天地之至和者爲君子、故溫良慈儉、乘陰陽之繆、整者爲小人、故凶詐奸邪。

重名節者、識有餘而巧不足、保富貴者、智不足而才有餘、智識明者君子、才巧勝者小人。

善惡之性不可易、如水不能燥、火不能濕、形色語默之間、善惡自見。

古之人孝弟力田、行著于鄉、州黨族名聞于朝、故命之以官、其臨民也、安得不豈弟、其從事也、安得不服勞、其事君也、安得不忠。

愛身者、所以孝于親、愛民者、所以忠于君。

高不可欺者、天也、尊不可欺者、君也、內不可欺者、親也、外不可欺者、人也、四者既不可欺、心其可欺乎、我心不欺、人其欺我乎。

溺愛者、受制于妻子、患失者、屈己于富貴。

大丈夫見善明、故重名節于泰山、用心剛、故輕生死如鴻毛。

父善教子者、教于孩提、君善責臣者、責于冗賤、蓋嗜慾可以奪孝、富貴可以奪忠。

爲善易、避爲善之名難、不患人易犯而不校難。

涉世應物、有以橫逆加我者、譬由行草莽中、荆棘之在衣、徐行緩解而已、所謂荆棘者、亦何心哉、如是、則方寸不勞而怨可釋。

以言傷人者、利如刀斧、以術害人者、毒如虎狼、言不可不擇、術不可不擇也。

古人畏四知者、謂天地、彼我、必有一知者、不得不畏、況處八達之衝、爲萬目所視、畏乎所當畏、行乎所無畏可也。

誠無悔、恕無怨、和無仇、忍無辱。

爲子孫作富貴計者、十敗其九、爲人作善方便者、其後受惠耳、不聞人之非、目不視人之短、口不言人之過、庶幾爲君子。

爲善不求人知者、謂之陰德、故其施廣、其惠博、天報必豐、是故聖人惡要譽、君子恥姑息、仁言不如仁心之誠、利近不如利遠之博、仁言或失于口惠、利近或幾于姑息。

智大心勞者狂、力小任重者跲。

知過之爲過者。恐懼不敢爲。不知過之爲過者。殺身而後已。

攫金于市者。欲心勝而不知有羞惡。求珠于淵者。利心專而不顧其沉溺。

晝之所爲。夜必思之。有善則樂。有過則懼。君子人也。晝之所爲。夜不敢思。行險蹈禍。以苟僥倖。其小人之徒歟。

沾虛譽于小人。不若受之于天。遺貨財于子孫。不若周人之急。

私心勝者。可以滅公。爲己重者。不知利物。

不欺不吝。不隘不強者。可與人爲徒。

禮、義、廉、恥。可以律己。不可以繩人。律己則寡過。繩人則寡合。寡合則非涉世之道。是故君子責己。小人責人。

德有餘而爲不足者。謙。財有餘而爲不足者。鄙。

愚勝智。拙勝巧。訥勝辯。知此者全身。昧此者蹈禍。

合天地者。或不能周人情。圖近利者。必知其無遠慮。

塊土不能障狂瀾。匹夫不能振頽俗。

蘇、張通六國而皆合。孔、孟走天下而不遇。易進難入。王霸之道。豈止如霄壤。

陶淵明無功德以及人。而名節與古忠臣義士等。何耶。豈顏氏子以退爲進。甯武子愚不可及之徒歟。